



**VIJEĆE FAKULTETA**

Broj: 01-238/22

Sarajevo, 25.02.2022. godine

Na osnovu člana 135. stav (3) alineja d) Zakona o visokom obrazovanju („Službene novine Kantona Sarajevo“, broj: 33/17, 35/20, 40/20 i 39/21) i člana 104. stav (2) Statuta Univerziteta u Sarajevu, Vijeće Fakulteta sporta i tjelesnog odgoja Univerziteta u Sarajevu na X sjednici održanoj dana 25.02.2022. godine, donosi sljedeću:

**O D L U K U**

**o usvajanju Pravilnika zaštite od požara na Fakulteta sporta i tjelesnog odgoja  
Univerziteta u Sarajevu**

I

Usvaja se Pravilnik zaštite od požara na Fakulteta sporta i tjelesnog odgoja Univerziteta u Sarajevu, koji čini sastavni dio ove Odluke.

II

Pravilnik zaštite od požara na Fakulteta sporta i tjelesnog odgoja Univerziteta u Sarajevu stupa na snagu danom donošenja i objavit će se na oglasnoj ploči i web stranici Fakulteta.

***Obrazloženje***

Na osnovu prihvaćenog Izvještaja Komisije za utvrđivanje prijedloga Pravilnik zaštite od požara na Fakulteta sporta i tjelesnog odgoja Univerziteta u Sarajevu, broj: 01-712/22 od 21.02.2022. godine, odlučeno je kao u dispozitivu.

Dostaviti:

- Dosije Vijeća
- Sekretar
- Pravna služba
- Irfan Ahatović, šef
- Oglasna poloča
- Web stranica
- a/a

**DEKAN**  
Prof.dr Haris Alić







**PRAVILNIK ZAŠTITE OD POŽARA  
FAKULTETA SPORTA I TJELESNOG ODGOJA UNIVERZITETA U  
SARAJEVU**

Sarajevo, februar 2022. godine



Na osnovu člana 24. Zakona o zaštiti od požara i vatrogastvu ("Službene novine FBiH", broj: 64/09), člana 135. stav (3) tačka d) Zakona o visokom obrazovanju ("Službene novine Kantona Sarajevo", broj: 33/17, 35/20 i 40/20), člana 104. Stav (2) tačka f). Statuta Univerziteta u Sarajevu, Vijeće Fakulteta sporta i tjelesnog odgoja Univerziteta u Sarajevu, na sjednici održanoj dana 25.02.2022. godine, donosi:

## PRAVILNIK

### ZAŠTITE OD POŽARA

#### I. OPŠTE ODREDBE

##### Član 1.

Zaštita od požara obuhvata skup mjera i radnji upravne, organizacijske, stručne, tehničke, obrazovne i propagandne prirode, koje se poduzimaju u cilju sprječavanja izbjivanja i širenja požara, njegova otkrivanja, lokalizacije i gašenja požara, te zaštite i spašavanja ljudi, biljnog i životinjskog svijeta, materijalnih, kulturnih, povijesnih i drugih dobara i okoliša (u nastavku: materijalna dobra) ugroženih požarom.

##### Član 2.

Radi sprječavanja izbjivanja požara, otklanjanja opasnosti od požara, spašavanja radnika i imovine ugroženih požarom, ovim Pravilnikom, u skladu sa zakonskim i tehničkim propisima, uređuje se način ostvarivanja prava i obaveza i utvrđuju druga pitanja na organizovanju, sprovođenju i unaprijeđenju zaštite od požara u Fakultetu sporta i tjelesnog odgoja Univerziteta u Sarajevu (u nastavku: Fakultet).

##### Član 3.

Mjere za zaštitu od požara propisane ovim Pravilnikom dužni su da sprovode svi radnici Fakulteta, a takođe sva lica koja se u bilo kom vidu nalaze ili zadržavaju u objektima, pomoćnim prostorijama ili u krugu Fakulteta, kao i subjekti koji eventualno koriste dijelove poslovnog prostora ovog Fakulteta.



### Član 4.

Pravilnikom zaštite od požara (u nastavku: Pravilnik), utvrđuje se:

- a) Organizovanje zaštite od požara u objektima, pomoćnim prostorijama ili u krugu Fakulteta;
- b) Mjere zaštite od požara kojima se otklanja ili smanjuje opasnost od nastajanja požara;
- c) Organizovanje i način obavljanja unutarnje kontrole sa aspekta provedbe mjera zaštite od požara te ovlaštenja i dužnosti uposlenika koji obavljaju tu kontrolu;
- d) Način upoznavanja uposlenika prilikom stupanja na rad ili rasporeda s jednog radnog mjesta na drugo o opasnostima od požara na tom radnom mjestu, kao i način obuke radnika za sprovodenje mjera zaštite od požara i rukovanja opremom i sredstvima za gašenje požara i vođenje evidencije o tome;
- e) Obaveze organa upravljanja, uposlenika zaduženih za održavanje u ispravnom stanju opreme i sredstava za dojavu i gašenje požara, drugih uposlenika za provedbu mjera zaštite od požara i studenata, te odgovornosti zbog nepridržavanja propisanih ili naređenih mjera zaštite od požara;
- f) Dužnosti i ponašanja uposlenika u slučaju nastanka požara;
- g) Vrsta i količina opreme i sredstava za provedbu mjera zaštite od požara, kao vrijeme povremenog ispitivanja njihove ispravnosti;
- h) Druga pitanja u vezi zaštite od požara.

### Član 5.

Zaštita od požara organizuje se i provodi u svim građevinama, građevinskim dijelovima i prostorima Fakulteta ( u nastavku: imovina Fakulteta), u skladu sa odredbama Zakona o zaštiti od požara (u nastavku: Zakon), drugim propisima donesenim na osnovu Zakona, Planom zaštite od požara i odredbama ovog Pravilnika.

### Član 6.

Odredbe ovog Pravilnika primjenjuju se na sve uposlenike Fakulteta koji zasnuju radni odnos na neodređeno i određeno vrijeme, koji rade sa punim ili skraćenim radnim vremenom , koji su u dopunskom radu ili zasnovali radni odnos kao pripravnici, odnosno rade bez zasnivanja radnog odnosa (pripravnici, volonteri), studenti, kao i sve ostale osobe koje se poslom ili slučajno zateknu u prostorijama Fakulteta.

Ako se uposlenik Fakulteta ne pridržava odredbi Pravilnika, čini povredu radne obaveze.



## II. ZAŠTITA OD POŽARA

### Član 7.

Zaštita od nastanka požara u građevinama, građevinskim dijelovima i prostorima Fakulteta, obuhvata organizovanje i druge mjere i radnje koje imaju zadaću:

- a) otklanjanje uzroka i smanjenja opasnosti od nastajanja požara, eksplozija i sl.
- b) otkrivanje i gašenje požara, te poduzimanje potrebnih mera radi sprječavanja širenja požara, odnosno bržeg gašenja požara.
- c) spašavanje ljudi, imovne Fakulteta i dr.
- d) pružanja pomoći i otklanjanje posljedica uzrokovanih požarom.

### Član 8.

Fakultet je posebno obavezan:

- a) održavati u ispravnom stanju uređaje, opremu i sredstva za dojavu, gašenje i sprječavanje širenja požara, te druge zaštitne uređaje i instalacije;
- b) držati opremu, uređaje i sredstva za gašenje požara na mjestima koja su vidljiva i najpogodnija za brzo djelovanje u slučaju nastanka požara;
- c) upoznati sve uposlenike i studente sa opasnostima nastanka požara, provedenim mjerama zaštite od požara i načinom upotrebe uređaja, opreme i sredstava za zaštitu od požara;
- d) predvidjeti mјere kojima je svrha uklanjanje uzroka požara i kontrolirati njihovu provedbu;
- e) odrediti i obilježiti prolaze za brzu evakuaciju ljudi i imovine u slučaju nastanka požara.

## III. MJERE ZAŠTITE OD POŽARA

### Član 9.

Radi otklanjanja uzroka zbog kojih može nastati požar, otklanjanja ili smanjenja opasnosti od nastajanja i širenja požara, omogućavanja gašenja požara, u ustanovi se utvrđuju i ostvaruju mјere zaštite od požara, i to:

- a) zapaljiva osnovna i druga sredstva, tvari sklone samozapaljivanju, otrovne ili nagrizajuće tvari ili tvari koje se mogu zapaliti ili eksplodirati zbog djelovanja vode ili kisika, upaljive tekućine i sl., mogu se držati ili skladištiti u propisno izvedenom i zaštićenom prostoru, spremnicima, ormarima, policama;



- b) u svim građevinama, građevinskim dijelovima i prostorijama (u nastavku: građevine i prostori), zabranjuje se korištenje uređaja i aparata koji mogu prouzročiti nastajanje i širenje požara (grijalice i slično);
- c) postrojenja, uređaji, električne, plinske, ventilacijske, toplinske, gromobranske i druge instalacije u građevinama i prostorima Fakulteta moraju biti izvedene prema tehničkim normativima, normama i uputama proizvođača, o čemu Fakultet mora posjedovati dokumentaciju o ispravnom stanju;
- d) prilikom projektiranja i izvođenja radova, adaptacije i rekonstrukcije, na postojećim građevinama, projektiranja i izgradnji novih građevina, ugradnje sredstava, uređaja i opreme, Fakultet je dužan postupiti u skladu odredbi zakona i propisima donesenim na osnovu zakona;
- e) za izvedene stabilne instalacije, namjenjene za gašenje ili dojavu požara te druge zaštitne uređaje i instalacije koje služe za sprječavanje nastanka i širenja požara i eksplozije, Fakultet je dužan pribaviti ispravu od ovlaštene pravne osobe o ispravnom djelovanju tih instalacija i uređaja, i zapisnik o obavljenom pregledu ovlaštene pravne osobe i dati ih na uvid komisiji za tehnički pregled;
- f) odmah prestati sa upotrebom građevine, postrojenja, uređaja, instalacija i dr. ako se njihovim preuređenjem ne može otkloniti nestanak koji može prouzročiti požar;
- g) o svim uočenim kvarovima na opremi, uređajima i instalacijama treba odmah obavijestiti neposrednog rukovodioca;
- h) zabranjeno je nestručnim licima vršiti bilo kakve intervencije i popravke mašina, uređaja i instalacija;
- i) niko od radnika ne smije blokirati rad sigurnosnih uređaja i alarmnih uređaja;
- j) ukloniti zapaljive tvari koje su ugrađene u konstruktivne elemente građevine ili kojima su obrađene horizontalne i vertikalne površine izlaza i izlaznih puteva ako ti elementi predstavljaju opasnost za nastajanje ili brzo širenje požara;
- k) građevine i prostori Fakulteta moraju biti ospkrbljeni uređajima, opremom i sredstvima za gašenje požara (hidrantski vodovi, stabilni ili pokretni uređaji za gašenje požara i druga oprema);
- l) dimnjaci, dimovodni objekti i ložišta (kotlovnice, peć na tekuće i čvrsto gorivo i sl.), čiste se na način propisan odlukom predstavničkog tijela, kojom se uređuje organizacija i rad dimnjачarske službe, rokovi čišćenja dimnjaka te obavljanje nadzora;
- m) na tavanima i potkovljima zabranjuje se držanje materijala, opreme i uređaja koji mogu uzrokovati požar;
- n) u svim građevinama i prostorijama zabranjuje se držanje predmeta koji mogu uzrokovati nastajanje požara ili eksplozije;
- o) vatrogasni pristupi (prilazni putovi, ulazi, izlazi, prolazi) u svim građevinama i prostorima Fakulteta moraju biti slobodni za brz i siguran izlazak iz ugrožene građevine ili prostora, te operativan vatrogasni rad;



- p) prostor oko hidranata (vanjskih i unutrašnjih) mora biti slobodan, a u zimsko doba vanjski hidrant mora biti očišćen od snijega, leda i slično i propisno vidno označen;
- q) kvar na sistemu za dobavu vode i hidrantskoj instalaciji obavezno odmah otklanja stručni radnik;
- r) obavezno je vidljivo označiti mjesto na kojem se nalazi glavni zasun za otvaranje - zatvaranje vode.
- s) svaki radnik je dužan svoje poslove i radne zadatke obavljati prema tehničkim i drugim uputstvima, izbjegavajući svaku improvizaciju i neprovjerene postupke koji mogu dovesti do požara i druge nezgode;
- t) obavezno je svakodnevno čišćenje radnog prostora, uklanjanje raznih otpadaka i smeća izvan prostorija Fakultet.

### Član 10.

U svim građevinama i prostorima ustanove zabranjuje se:

- a) loženje peći drvima, ugljenom i slično ako nisu postavljene na vatrostalnu podlogu, a ložišta nisu osigurana podpečnjacima ili limom;
- b) držanje opasnih i zapaljivih tvari u blizini ložišta, peći i slično;
- c) korištenje improviziranih električnih osigurača i instalacija mogućih uzročnika požara, posebice u građevini ili prostoru Fakulteta označenom kao mogući požarni sektor;
- d) držanje zapaljivih i opasnih tvari na zabranjenim mjestima u Fakulteta; pušiti ili bacati pepeo u drvene ili kartonske kutije ili posude;
- e) bacanje opušaka cigareta ili šibica u košare za papir te kutije ili posude od drveta ili kartona;
- f) upotreba zapaljivih i opasnih tvari za čišćenje u blizini otvorene vatre, te pušiti u prostorijama Fakulteta za vrijeme čišćenja zapaljivih i opasnih tvari;
- g) obavljanje određenog posla u građevini ili prostoru Fakulteta (lakiranje, pretakanje zapaljivih tekućina i sl.), bez prethodnog provođenja mjere zaštite od požara;
- h) koristiti plinske peći, bojlere i druge uređaje bez prethodne provjere ispravnosti od strane ovlaštene pravne osobe;
- i) pušenje, ako su na ulaznim vratima postavljeni vidljivi znakovi o zabrani: "zabranjeno pušenje".



### Član 11.

- (1) U radionicama, spremištima i slično, provode se posebne mjere zaštite od požara, ako zakonom i aktom ministra unutrašnjih poslova nije drukčije određeno.
- (2) Mjerama iz stava (1) ovoga člana određuje se:
- a) zabrana upotrebe otvorene vatre (pušenje, zavarivanje, svjetiljke sa otvorenim plamenom, otvorena ložišta, elektroinstalacije koje nisu u sigurnosnoj izvedbi);
  - b) električne, ventilacijske i toplinske instalacije i uređaje treba neprekidno držati u ispravnom stanju i provjeravati;
  - c) postorije iz stava (1) ovog člana treba redovito održavati, pospremati, čistiti, provjetravati, nadzirati;
  - d) onemogućiti ubacivanje predmeta izvana u radionice, spremišta i slično, koji bi mogli prouzročiti požar;
  - e) obavezno postavljanje odgovarajućeg broja vatrogasnih aparata, a prema potrebi i drugih uređaja i opreme skladno zakonu i propisima donesenim na temelju zakona;
  - f) hodnici, stubišta, izlazi, prolazi i prilazi prostorima moraju biti uvijek slobodni za brz i siguran prilaz i prilazak.

### Član 12.

- (1) Ako se u građevini ili prostoru ustanove održava veći skup kojem je prisutan veći broj osoba, ustrojava se dežurstvo radi zaštite od nastanka požara i eksplozija.
- (2) Uposlenici zaduženi za dežurstvo moraju biti osposobljeni za rukovanje i upotrebu sredstava za zaštitu od požara, znati raspored tih sredstava u građevini i prostorima Fakulteta, potrebne telefonske brojeve za dojave i intervencije, imati ključeve prostorija koje se zaključavaju i poznavati sve sporedne i nužne izlaze iz građevine i prostora ustanove.

## IV. ORGANIZOVANJE I NAČIN UPRAVLJANJA I UNUTRAŠNJE KONTROLE

### Član 13.

- (1) Radi provedbe mjera zaštite od požara na Fakultetu se organizuje unutrašnji nadzor.
- (2) Unutrašnji nadzor nad provođenjem mjera obavlja uposlenik zadužen i odgovoran za provođenje mjera od požara na način i u rokovima propisanim zakonom i propisima donesenim na temelju zakona i ovim Pravilnikom.



### Član 14.

- (1) Nadzor nad ispravnošću električnih, gromobrankskih, i plinskih instalacija na zahtjev Fakulteta obavlja ovlašteno preduzeće ili radnja odnosno druga pravna osoba u skladu zakona i propisima donesenim na temelju zakona.
- (2) O ispravnosti instalacija iz stava (1) ovog člana Fakultet mora posjedovati dokumentaciju ovlaštenog preduzeća ili radnje.
- (3) Ispitivanje ispravnosti sistema za gašenje ili dojavu požara vrši se najmanje dva puta godišnje. O ispitivanju ispravnosti sistema mora postojati dokumentacija sa datumom pregleda i nedvosmislenom konstatacijom o ispravnosti.

### Član 15.

Nadzor nad radom uređaja centralnog grijanja (instalacije i kotlovnice) obavlja ovlašteni uposlenik Fakulteta svakodnevno tokom rada uređaja, te periodično. Periodični pregled mora se obaviti najmanje jednom u godinu dana.

### Član 16.

Upoznati zadužen i odgovoran za provođenje mjera zaštite ima sljedeća ovlaštenja i dužnosti:

- a) upoznati svakog uposlenika prilikom stupanja na rad ili rasporeda s jednog mjesta na drugo s opasnostima od požara na tom radnom mjestu i na Fakultetu, te mjerama zaštite na radnom mjestu i na Fakultetu;
- b) organizovati obuku uposlenika;
- c) kontrolirati ispravnost svih instalacija, sistema za dojavu i gašenje požara, uređaja, opreme, i sredstava namjenjenih zaštiti od požara;
- d) provjeravati upotrebljivost opreme i sredstava za gašenje požara, te o uočenim nepravilnostima izvjestiti dekana;
- e) voditi brigu da se odmah ili u najkraćem roku otklone uočene nepravilnosti i dovedu u ispravno stanje neispravni sistemi za dojavu i gašenje požara u skladu sa zakonom i propisima donesenim na temelju zakona;
- f) voditi brigu o održavanju vatrogasnih aparata, izboru novih vatrogasnih aparata te njihovom pravilnom rasporedu;
- g) u slučaju nastanka požara dužan je odmah izvjestiti nadležnu policijsku upravu, odnosno najbližu vatrogasnou jedinicu, centar za obavještavanje i uzbunjivanje ili drugo nadležno tijelo, jedinice lokalne samouprave i uprave;
- h) u slučaju nastanka većeg požara nalaže se spašavanje uposlenika, studenata, djece imovine te rukovodi gašenjem požara do dolaska vatrogasne jedinice;



- 
- i) u slučaju neposredne opasnosti od nastajanja i širenja požara poduzima mjere za otklanjanje tih opasnosti;
  - j) u građevinama i prostorima Fakulteta postavlja pismena upozorenja o sigurnosnim mjerama.

### Član 17.

(1) Dekan posebnom odlukom određuje uposlenika odgovornog za provođenje mjera zaštite od požara.

(2) Odlukom iz stava (1) ovog člana dekan utvrđuje ovlaštenja i dužnosti uposlenika odgovornog za provođenje mjera zaštite od požara.

## V. UPOZNAVANJE I OBUKA UPOSLENIKA

### Član 18.

Fakultet je dužan obezbjediti da svaki radnik bude upoznat sa opasnostima od požara vezano za poslove i radne zadatke na koje je raspoređen, kao i opremom i sredstvima za gašenje požara, praktičnom upotrebotom aparata za početno gašenje požara i drugih sredstava za gašenje požara, kao i sa materijalnom i drugom odgovornošću uslijed ne pridržavanja propisanih mjera zaštite od požara.

### Član 19.

Upoznavanje sa opasnostima od požara iz prethodnog člana obavezno se vrši:

- a) pri zasnivanju radnog odnosa, a prije raspoređivanja radnika na poslove i radne zadatke;
- b) kod izmjena uslova rada i uvođenja novih poslova na kojima je pojačana opasnost od izbijanja požara;
- c) kod prijema na praksi i pri stručnoj obuci pripravnika kada postoji potreba za tim.

### Član 20.

Organizovanje zaštite od požara na Fakultetu treba vršiti:

- a) obukom radnika po posebnom programu obuke radnika u pravnim licima, državnim organima i drugim institucijama u oblasti zaštite od požara,
- b) izradom odgovarajuće dokumentacije iz oblasti zaštite od požara za odjeljenja koja su zakonski obavezna istu imati,
- c) isticanjem na vidnom mjestu odgovarajućih uputstava, natpisa, plakata i upozorenja.



### **Član 21.**

(1) Prema članu 128. stav (3) Zakona o zaštiti od požara i vatrogastvu („Sl. novine FBiH“, broj:64/09) Fakultet je obavezan da organizuje i izvrši jednom u dvije godine obuku i provjeru znanja iz oblasti zaštite od požara svih zaposlenih lica prema posebnom programu obuke.

(2) Svi radnici su dužni pristupiti obuci i provjeri znanja, u suprotnom čine povredu radnih obaveza i dužnosti.

### **Član 22.**

(1) Upoznavanje i obuka uposlenika vrši se putem odgovarajućih predavanja i kroz praktičnu obuku, a prema posebnom programu obuke.

Obuku mogu vršiti odgovarajuće stručne organizacije ili stručni radnici.

(2) Nakon izvršene obuke radnika vrši se provjera znanja radnika (usmeno ili pismeno, testiranjem).

### **Član 23.**

O obuci i provjeri znanja radnika obavezno se vodi odgovarajuća evidencija od strane lica zaduženih za zaštitu od požara.

## **VI. OBAVEZE I ODGOVORNOSTI ORGANA UPRAVLJANJA, DEKANA, UPOSLENIKA I STUDENATA**

### **Član 24.**

Za ostvarivanje i unapređivanje mjera zaštite od požara u okviru dužnosti i zadaća utvrđenih zakonom i ovim Pravilnikom , odgovorni su:

- a) odgovorno lice za provođenje mjera zaštite od požara,
- b) dekan,
- c) uposlenici, svaki u okviru poslova radnog mesta na koje je raspoređen, te studenti.

### **Član 25.**

Odgovorno lice Fakulteta za provođenje mjera zaštite od požara u okviru svoje nadležnosti ima sljedeće dužnosti:



- a) inicira donošenje Pravilnika o zaštiti od požara i prati njegovo ostvarivanje, odlučuje o sredstvima za provođenje mjera zaštite od požara,
- b) razmatra izvještaje (zapisnik, rješenje) tijela nadzora (inspektora za zaštitu od požara, policijskih uprava, i Ministarstva u sjedištu, policijskih uprava i drugih nadležnih tijela, poduzeća i radnji) nad provođenjem mjera zaštite od požara i nalaže da se utvrđene nepravilnosti otklone u naloženom roku;
- c) dostavlja izvještaje nadležnim organima (CSB) o svim nedostacima i nepravilnostima u vezi sa zaštitom od požara;
- d) brine se o ispravnosti električne, toplovodne, gromobranske, dimovne i druge instalacije;
- e) drži u pripravnosti u ispravnom stanju uređaje, alat i opremu za gašenje požara na mjestima koja su lako dostupna i pristupačna;
- f) brine se o redovnoj kontroli aparata za početno gašenje požara (svakih šest mjeseci);
- g) brine se o vršenju obuke radnika, kao i provjere znanja radnika iz oblasti zaštite požara;
- h) obezbjeđenje prohodnosti svih požarnih prilaza i prolaza;
- i) redovno dostavlja izvještaje o stanju zaštite od požara dekanu;
- j) vodi svu potrebnu evidenciju iz oblasti zaštite od požara;
- k) u slučaju nastanka požara organizuje akciju gašenja početnog požara i rukovodi njome, a ako požar ne može ugasiti poziva vatrogasnu jedinicu, a do njihovog dolaska spriječava širenje požara;
- l) vrši i druge poslove u vezi sa zaštitom od požara, u skladu sa zakonom i propisima donesenim na temelju zakona.

## Član 26.

Dekan Fakulteta u okviru svoje nadležnosti ima sljedeće dužnosti:

- a) osigurava provođenje i primjenu Pravilnika o zaštiti od požara;
- b) organizuje i provodi mjere zaštite od požara u skladu sa zakonom i propisima donesenim na osnovu zakona;
- c) određuje radnika koji bi kao odgovorno lice sprovodio propisane mjere zaštite od požara;
- d) preko radnika odgovornih za primjenu mjere zaštite od požara ostvaruje nadzor nad provođenjem mjera zaštite od požara;
- e) podnosi zahtjev za pokretanje disciplinskog postupka zbog povrede radne obaveze protiv radnika koji ne provodi propisane mjere zaštite ili se ne pridržava propisanih odnosno naređenih mjera zaštite od požara;
- f) vrši nabavku potrebnog broja aparata i uređaja za gašenje požara;



- 
- g) odgovara za održavanje u ispravnom stanju sistema za i gašenje požara odnosno vatrogasne opreme i uređaja za gašenje požara te za održavanje u ispravnom stanju svih instalacija i postrojenja;
  - h) osigurava otklanjanje nepravilnosti koje prilikom nadzora utvrđi nadležno tijelo;
  - i) vrši i druge poslove u vezi zaštite od požara u skladu sa zakonom i propisima donesenim na temelju zakona.

### Član 27.

Uposlenici Fakulteta u pogledu zaštite od požara imaju sljedeće dužnosti:

- a) pridržavati se svih propisanih mjera zaštite od požara utvrđenih Zakonom drugim propisima, kao i uputstvima i upozorenjima odgovornog lica,
- b) upoznati se sa opasnostima od požara na radnom mjestu i na Fakultetu, odnosno sa mjerama zaštite od požara na radnom mjestu i na Fakultetu;
- c) upoznati se sa opremom i sredstvima za gašenje požara;
- d) upoznati se sa odgovornošću zbog nepridržavanja propisanih ili naređenih mjera zaštite od požara;
- e) prisustovati usmenom i praktičnom upoznavanju (obuci) koja se organizira za radnike ustanove radi upoznavanja s opasnostima od požara, mjerama zaštite te upotrebe vatrogasne opreme, uređaja i sredstava za gašenje požara;
- f) tokom rada, a naročito nakon završetka radnog vremena otkloniti sve moguće uzročnike požara (ugasiti vatru, isključiti mašine i sl.);
- g) održavati i u ispravnom stanju koristiti sigurnosne uređaje i lična zaštitna sredstva; ne bacati opuške cigareta ili šibice u košare za papir, drvene ili kartonske kutije,
- h) obratiti pažnju na miris nagorjelih instalacija kod električnih strojeva i drugih uređaja;
- i) o kvarovima i drugim nedostacima odmah izvestiti uposlenika zaduženog i odgovornog za provođenje mjera zaštite od požara;
- j) da učestvuje u spasavanju i pružanju prve pomoći u slučaju nesreće na radu, mjestu izazvane požarom, kao i drugim poslovima spašavanja materijalnih dobara bez obzira na propisano radno vrijeme i kvalifikaciju;
- k) predlagati dekanu poduzimanje određenih mjera i radnji namjenjenih otklanjanju mogućih uzroka nastajanja požara;
- l) da obavlja i ostale poslove u vezi sa zaštitom od požara koje mu postavi odgovorno lice.



## VII.DUŽNOSTI RADNIKA U SLUCAJU NASTANKA POZARA

### Član 28.

(1) Svaki radnik Fakulteta u skladu sa odredbama zakona i propisima donesenim na osnovu Zakona i ovog Pravilnika u slučaju nastanka požara ili neposredne opasnosti od nastanka požara, dužan je:

- a) odmah otkloniti opasnost od nastanka požara;
- b) ugasiti požar ako to može učiniti bez opasnosti po sebe ili druge radnike;

(2) Ako radnik ne može sam ugasiti požar, dužan je odmah izvestiti nadležnog rukovodioca ili radnika zaduženog za provođenje mjera zaštite od požara, odnosno u slučaju njihove odsutnosti najbližu vatrogasnu jedinicu, policijsku upravu, stanicu, ispostavu ili centar za obavještavanje i uzbunjivanje, odnosno drugo tijelo lokalne samouprave ili uprave;

- radnici koji su primjetili požar ili su pozvani u pomoć radi nastanka požara, obavezni su odmah svim raspoloživim vatrogasnim aparatima ili drugom odgovarajućom opremom, uređajima i sredstvima ugasiti nastali požar;
- broj radnika na mjestu požara odnosno požarnom sektoru ovisi o procjeni osobe koja rukovodi gašenjem požara i trenutnoj požarnoj situaciji;
- pomagati vatrogasnoj jedinici u gašenju požara;
- dati potrebne podatke o predmetima ili osobama koji mogu poslužiti za utvrđivanje uzroka požara;

### Član 29.

(1) Radnici Fakulteta odgovorani su za provođenje mjera zaštite od požara utvrđenih ovim Pravilnikom.

(2) Radnik koji svojim krivnjom ne provede propisane mjere zaštite, ne pridržava se propisanih mjera zaštite od požara te dužnosti u slučaju nastanka požara, čini težu povredu radne obaveze.

(3) Odgovornost iz stava (2) ovog člana na isključuje krivičnu i materijalnu odgovornost.

### Član 30.

Svaki radnik koji primjeti da postoji neposredna opasnost od izbjijanja požara ili primjeti požar, obavezan je da opasnost otkloni, odnosno da požar ugasi, ukoliko to može da učini bez opasnosti za ličnu bezbjednost ili bezbjednost drugih radnika.



### Član 31.

Ukoliko radnik ne može da izvrši obavezu iz člana 30. Pravilnika, obvezan je da obavijesti vatrogasnu jedinicu i odgovarajući općinski organ.

### Član 32.

(1) Neposrednim gašenjem požara do dolaska vatrogasne jedinice rukovodi odgovorno lice za zaštitu od požara.

(2) U slučaju iz stava (1) ovog članka, odgovorno lice na temelju procjene požarne situacije organizira dopremu vatrogasnih aparata, druge opreme i sredstava za gašenje požara na mjesto gašenja te organizuje raspored uposlenika i njihovo sudjelovanje u gašenju požara;

- Nalaže se da se odmah započne s gašenjem požara;
- Nalaže se isključenje električne struje i plina: upotrebu osobnih zaštitnih sredstava;
- Uklanjanje zapaljivih tvari iz požarnog sektora, te
- Poduzima mjere za sprečavanje širenja požara; Poduzima mjere za sprečavanje nastanka panike;
- Nalaže i organizira udaljavanje studenata, uposlenika i imovine iz zgrade,
- S mesta gašenja požara udaljava uposlenike koji nemaju zadatak u gašenju požara;
- Poduzima potrebne mjere kako bi se sačuvali tragovi i predmeti koji mogu poslužiti za utvrđivanje uzroka nastanka požara.

### Član 33.

Fakultet je dužan nakon požara upotrebljenu opremu, uređaje i druga sredstva dovesti u ispravno stanje.

## VIII. ODGOVORNOSTI RADNIKA ZBOG NEPRIDRŽAVANJA PROPISANIH MJERA ZAŠTITE OD POŽARA

### Član 34.

(1) Nepoštivanje odredbi i mjera važećih propisa o zaštiti od požara kao i odredbi ovog Pravilnika, naloga nadležnih organa i Dekana Fakulteta predstavlja težu povredu radne discipline.



---

(2) Svaki radnik koji primjeti da je učinjena povreda radne discipline zbog nepridržavanja propisanih mjera zaštite od požara dužan je da podnese prijavu nadležnom organu za pokretanje postupka zbog povrede radne discipline.

### Član 35.

Kao teža povreda radne obaveze iz oblasti zaštite od požara smatra se, naročito:

- a) izazivanje požara, namjerno ili iz nehata,
- b) upotreba otvorene vatre ili pušenje na zabranjenim mjestima (u svim prostorijama Fakulteta),
- c) zloupotreba ili nenamjenska upotreba opreme za gašenje požara, kao i njihovo namjerno oštećenje,
- d) izbjegavanje ili odbijanje učešća u akcijama gašenja požara i spašavanja lica i imovine ugrožene požarom,
- e) neprijavljivanje požara ili nepoduzimanje mjera za gašenje požara i spašavanja lica imovine ugrožene požarom,
- f) ometanje akcije gašenja požara i spašavanja radnika i imovine,
- g) ostavljanje neočišćenog radnog mjesta po isteku radnog vremena, što može imati teže posljedice za nastanak i širenje požara,
- h) neovlašteno blokiranje rada sigurnosnih i alarmnih uređaja,
- i) zakrčavanje opreme za gašenje požara, vanjskih i unutrašnjih požarnih i komunikacionih puteva, te prilaza do objekata,
- j) neobavljanje periodičnih pregleda ispravnosti instalacija i funkcionalnosti opreme, uređaja i instalacija koji su u funkciji zaštite od požara,
- k) nevršenje propisane kontrole sprovođenja propisanih mjera zaštite od požara,
- l) neobezbjedenje objekata sa aparatima za početno gašenje požara i drugom opremom za gašenje požara,
- m) nepristupanje obuci i provjeri znanja iz oblasti zaštite od požara.

### Član 36.

Svaki radnik koji namjerno ili iz krajnje nepažnje prouzrokuje požar dužan je da nadoknadi štetu, a u skladu sa važećim propisima.

## IX.UREĐAJI I OPREMA ZA GAŠENJE POŽARA

### Član 37.

(1) U svim građevinama i prostorima Fakulteta postavlja se vatrogasna oprema, uređaji i sredstva za gašenje požara.

(2) Vatrogasnu opremu, uređaje i sredstva za gašenje požara iz stava (1) ovog člana čine:



---

vatrogasni aparati i sistemi za dojavu i gašenje požara, ukoliko posebnim propisom nije drugačije utvrđeno.

### Član 38.

Broj i vrstu sredstava i opreme za gašenje požara propisuje preduzeće koje je radilo projektnu dokumentaciju, odnosno za to ovlaštena institucija ili Fakultet.

### Član 39.

Evidenciju sprava i opreme za gašenje požara vodi odgovorno lice.

### Član 40.

Vatrogasni aparati postavljaju se na sljedeća mjesta na Fakultetu:

- lako dostupna mjesta,
- u prolazu ili hodniku,
- biblioteci,
- kotlovnici.

Jedinični vatrogasni aparati su uglavnom tipa: S 9kg, S 6kg, i C02 5kg.

### Član 41.

(1) Oko svih uređaja i opreme za gašenje požara moraju se uvijek osigurati prilazni putevi i slobodan prostor, a u zimskom periodu hidranti moraju biti obezbijeđeni od smrzavanja vode u njima.

(2) Zabranjeno je opremu i sredstva za gašenje požara koristiti u nemamjenske svrhe, u suprotnom čini se povreda radnih obaveza i dužnosti.

### Član 42.

U građevinama i prostorijama Fakulteta moraju se postaviti vatrogasni aparati i u slučaju kad imaju ugrađenu stabilnu instalaciju za gašenje požara i hidrantsku mrežu.

### Član 43.

(1) Hidrantska mreža mora biti projektirana i tako izvedena da prilikom gašenja požara mlaz može doprijeti do svake građevine i prostora Fakulteta.

(2) Mreža iz stava (1) ovog člana mora osigurati odgovarajući pritisak i protok vode dovoljan za djelotvorno gašenje požara. Suha hidrantska mreža mora imati odgovarajuću nepropusnost i prohodnost cjevovoda koja će osigurati brzo i djelotvorno gašenje.



### Član 44.

Pregled i ispitivanje ispravnosti vatrogasnih aparata i hidrantske mreže obavlja se na sljedeće načine:

- a) Svakodnevno se vrši vizualni pregled ispravnosti vatrogasnih aparata i hidrantske mreže;
- b) Dva puta godišnje (svakih šest mjeseci) obavlja se periodični pregled vatrogasnih aparata i hidrantske mreže;
- c) Kontrolno ispitivanje vatrogasnih aparata i hidrantske mreže obavlja ovlašteno preduzeće ili radnja;
- d) Ovlašteno preduzeće ili radnja obavezno je o izvršenom periodičnom pregledu voditi evidenciju, a o kontrolnom pregledu načiniti izvještaj, te ih dostaviti Fakultetu u roku od 8 dana izvršenog periodičnog pregleda, odnosno kontrolnog ispitivanja.

### Član 45.

Sredstva za provedbu mjere zaštite od požara osiguravaju se u godišnjem budžetu Fakulteta, u skladu sa godišnjim planom i programom rada.

### Član 46.

Održavanje sredstava i opreme za gašenje požara obavlja se prema uputama proizvođača te odredbi Zakona o zaštiti od požara i tehničkih propisa.

### Član 47.

U slučaju izmjene procesa rada ili namjene objekta potrebno je propisati nova sredstva za gašenje požara u skladu sa izmjenama procesa rada i namjene objekta.

### Član 48.

(1) Nadzor nad provedbom mjera zaštite od požara vrše inspektori za zaštitu od požara.

(2) Prilikom vršenja nadzora Fakultet je obavezan omogućiti inspektoru za zaštitu od požara pregled svih građevina i prostora, te preuzimanje drugih radnji neophodnih za utvrđivanje primjene propisanih mjera zaštite od požara.



## X.PRIJELAZNE I ZAVRŠNE ODREDBE

### Član 49.

- (1) Lice zaduženo za zaštitu od požara dužno je sarađivati sa svim ovlaštenim preduzećima i drugim pravnim licima iz oblasti zaštite od požara, a naročito sa:
- a) nadležnim inspekcijskim i drugim organima opštine, kantona i federacije - države,
  - b) vatrogasnim jedinicama na teritoriji Kantona, odnosno opštine,
  - c) stručnim organizacijama koje se bave zaštitom od požara.
- (2) Saradnja sa ovlaštenim organizacijama i pravnim licima ostvarivat će se kroz lične kontakte i konsultacije, prisustvovanje stručnim seminarima, savjetovanjima i izložbama, traženje stručnih savjeta i objašnjenja, planiranje izvođenja praktičnih i vatrogasnih vježbi u krugu Fakulteta, obavljanje stručnih pregleda objekata i tehničke dokumentacije, izradu plana, programa i drugih projekata zaštite od požara itd.

### Član 50.

Ukoliko ovim Pravilnikom nisu regulisana neka pitanja iz oblasti zaštite od požara, primjenjivat će se neposredno odredbe Zakona o zaštiti od požara i drugih propisa iz oblasti zaštite od požara.

### Član 51.

Za tumačenje odredbi ovog Pravilnika nadležno je Vijeće Fakulteta.

### Član 52.

Ovaj Pravilnik stupa na snagu danom donošenja i objavit će se na oglasnoj ploči i web stranici Fakulteta sporta i tjelesnog odgoja Univerziteta u Sarajevu.

Broj: 01- 833-1 /22  
Sarajevo: 25.02.2022. godine

